

Date – 29/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kumin January ni 1 atanga December ni 22 thleng khan Mizoramah nau piang 15,836 an awm a, mitthi 6,392 an awm thung.
2. Tun hnai engemawzat khan African Swine Fever (ASF) vawk pulhri leng avangin vawk thi leh suat a awm tawh lo.
3. Civil Aviation Principal Consultant hlui wing commander Joe Lalhmingliana chuan Lengpui tumhmun hi Indian Air Force kuta hlan a nih chuan a la pawl hle dawn a ni, a ti.
4. Prime Minister hlui Dr. Manmohan Singh-a chu sorkar chawimawina famkim nen nimin khan New Delhi-a Nigam Bodh Ghat-ah vuiliam a ni.

<><><>

BIRTHS & DEATHS

Economics & Statistics directorate-in an chhinchhiah danin kumin January ni 1 atanga December ni 22 thleng khan Mizoramah nau piang 15,836 an awm a, mitthi 6,392 an awm thung.

Nau piang hi Aizawl district-ah an tam ber a, hemi chhung hian 6,624 nau piang an awm a, Lawngtlai district-in dawtin nau piang 2,367 awmin Champhai district-ah nau piang 1,407 an awm bawk a. Lunglei district aiin tlemin an tam a ni. Hnahthial district-ah chuan nau piang 72 chauh an awm thung. Mitthi hi thih chhan tarlan chiah loh 4,366 zet an awm a, cancer vanga thi 623 an awm lai-in thawkna lam tha lo (respiratory diseases) vanga thi 520 an awm bawk. Lung lam natna (heart disease) vanga thi 467 an awm a, chet sual palh (accident) vanga thi 209 awmin, mahni intihlum 58 an awm bawk a ni. Hemi chhunga thi hi Aizawl district-ah an tam ber a, 3,041 lai an awm a, cancer vanga thi ringawt pawh 344 an awm a ni. Thawhah lam vanga thi 298 awmin lung natna vanga thi 332, chetsual avanga thi 114 leh mahni intihlum 20 an awm bawk a ni.

<><><>

ASF UPDATE

Tun hnai ni 5 chhung khan African Swine Fever (ASF) vawk pulhri leng avangin vawk thi a awm tawh lova, December ni 14 atang khan vawk damlo suat a awm tawh lo bawk.

AH and Vety department hotute chhinchhiah danin ni khata vawk thi leh suat tam ni awm leh zauh thin mah se vawk thi leh suat hi November thla laihawl vel atang khan a tlem chho zel a. December thla-ah pheii chuan ASF vawk pulhri leng hian zia-awm lam a pan zual hle. December ni 14, 15, 17, 20,

21, 22, 24, 25, 26, 27 leh 28-te hian vawk thi leh vawk damlo suat a awm lova. Chutih laiin December ni 18 khan Lunglei district-ah vawk 34 lai a thi thung a, a hma December ni 16 khan vawk 8 a thi a, ni 19 leh 23 khan vawk 1 ve ve a thi bawk. December ni 13 khan vawk damlo pakhat suat a ni a, hemi hnu hian vawk suat a awm leh tawh lo.

Kumin February ni 9-a Champhai district Leithum khua a ASF vawk pulhri vanga thi an finfiah atanga kumin chhunga vawk thi zat chu 14,950 a ni a, vawk dam lo suat zat chu 24,177 a tling tawh bawk. Official-te chuan thlasikah chuan hri leng hi a zia-awm chho zel turah an ngai a, chutih rualin ASF vawk pulhri hian kum 2021 a rawn luh atang khan Mizoram a chhuahsan leh tawh lo a, kumtinin kum bul lam atangin a leng tan leh ziah thin a ni.

March ni 21, 2021 khan Lunglei district a Lungsen khua-ah ASF vawk pulhri vei hmasa ber chu finfiah a ni a. Hemi kum hian vawk 33,417 zet ASF pulhri vang hian thi-in vawk 12,568 chu suat a ni a. A kum leh 2022 khan pulhri avang bawk hian vawk 12,791 a thi leh a, vawk 11,594 chu he vawk pulhri darh zel venna atan hian suat a ni. Nikum khan ASF vanga vawk thi hi a tlem chhova, 1,039 thi-in vawk 928 suat a ni bawk a ni.

<><><>

LENGPUI AIRPORT

Civil Aviation a Principal Consultant hlui wing commander Joe Lalhmingliana chuan Mizoram sorkarin thlawhna tumhmun a neih chhun Lengpui tumhmun hi Indian Air Force kuta a hlan chuan a la pawl hle dawn a ni, a ti.

Akashvani Aizawl zawhna chhangin Pu Lalhmingliana chuan tuna sorkarin Indian Air Force kuta Lengpui tumhmun hlan a tum hi a tipuitling a nih chuan chatuan a inchhirna tur a ni, a ti a. Tun dinhmunah hian Lengpui tumhmun atanga thlawk chhuak leh rawn tum thin hi kum khatah mi nuai 4, sing 2 leh sang 5 an tling tawh niin Pu Lalhmingliana chuan a sawi a. Lengpui tumhmun leh a chhehvela sorkar thil neihte hi a nihna tur ang taka enkawl a, pawisa lak theihna tur apiang lak a nih chuan he thlawhna tumhmun atang hian sorkarin hlawkna a tel thei a ni a ti a. Tunah pawh hian kum khatah cheng vaibelchhe 9 vel lakluh a nih thu a sawi a ni. A hma khan Airport Authority of India khan an kuta hlan a nih theihna turin thu delhkih engemaw zat an siam a, thenkhat chu Mizoram sorkar tan pawm chi a nih loh avangin inremna siam theih a ni ta rih lo niin a sawi a. Indian Air Force hnena hlan pheih chu thil tih chi miah lo ni a a hriat thu a sawi a ni.

Pu Lalhmingliana chuan mi thenkhatin Lengpui tumhmun chei thatna sum sen avangin sorkar tana sum senna hlir leh hloh hlira kal anga an sawi chu an hriat fuh loh vang a nih thu a sawi a. He thlawhna tumhmun chei thatna atana cheng vaibelchhe tam tak sen chu Mizoram sorkar sumbawm (budget) atangin cheng khat pawh hman a ni lo a ti a. Sorkar laipui hnuai a Lengpui tumhmun cheina tur atana budget pawn atanga hmuh vek a nih thu a sawi a ni.

Sorkar hian tun ai hian Lengpui tumhmun atang hian sum tam zawk a hmuh chhuah theih dan a awm niin a sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar hi puan leh a ni ang.

<><><>

NEW YEAR PREP

Kumhlui thlaha kum thar lawm turin state mipuite ngawrh takin an inpuah chah mek zel a, kumin chhunga Inrinni hnukung ber nimin khan Inrinni a tihdan thin pangngaiin chawhmeh leh bazar hmun lun lai te hawn a ni a

Aizawl ah chuan, inrinni dang aiin mipui an thawl zawk ni a hriat a ni a, chawhmeh bazar hmun te pawh a thawl viau niin kan corr chuan a sawi a ni.

Lungleiah chuan Inrinni dang aiin Super market chheh velah thil lei leh bazar an tlem zawk niin kan corr thudawna chuan a sawi a, Kum 20 chuang dawr lo nghak tawh pa pakhat chuan Lunglei Municipal Council a lo awm tak avang leh ni za inhlawhna a bo tak avanga pawisa lengvak tlem chuan inhralh a har phah ta ni a a ngaih thu a hrilh.

Sorkar in halpuah leh halmawi lam chi a khap chu Sub.Hqtrs.YMA Lunglei pawhin an theih ang tawh a thlawpin branch hrang hrang hmala turin ngenna an ti chhuak tawh tih Pu Zothanzuala Hnamte,Secretary Sub.Hqtrs.YMA Lunglei chuan a sawi

Lawngtlai District ah a nawlpui ang chuan Krismas lawmna zawhfel thahwkhat a ni a, khua leh veng thenkhat ah chhunlam ah Krismas lengkhawm hriattur a la awm tih kan corr chuan a sawi aa, Kohhran hrang hrang ten Krismas leh kumthar inkar ah Zaikhawm nei chhunzawm turin ruahmanna an siam a ni a ti.

Lawngtlai DC Pu Cheemala Siva Gopal Reddy chuan Lawngtlai a Akashpani corr zawhna chhangin khawi hmun atang mahin thil duhawmlh thleng hriat a nihloh thu a sawi a, ramri boruak a muanawm a, mipuiten boruak nuam tak hnuaiiah Krismas an lawm chu lawmawm a tihthu a sawi a, Khua leh veng hrang hrangah Tlawmngaipawl te inpekrate, Kohhran lamin tan an laknate, Chanchinbumiten mipui zirtirna an thehdarh nasate chuan boruak a ti muanawm tih sawiin Lawngtlai DC chuan Lawngtlai Police te thawhrimna pawh fakawm a tih thu a sawi.

<><><>

SINGH LAID TO REST

Prime Minister hlui Dr. Manmohan Singh-a chu sorkar chawimawina famkim nen nimin khan New Delhi-a Nigam Bodh Ghat-ah vuiliam a ni. Sikh sakhaw dan anga vuina inkhawm hman zawhah President Droupadi Murmu, Vice President Jagdeep Dhankhar, Prime Minister Narendra Modi, Union Minister Rajnath Singh, Amit Shah leh Jagat Prakash Nadda leh LoK Sabha Speaker Om Birla-ten zahna chibai hnukung an hlan a. Congress Party hruiatu Mallikarjun Kharge, Sonia Gandhi, Rahul Gandhi leh hruiatu pawimawh dangte pawhin chibai an hlan a. Vuina inkhawmah hian sipai chi 3 hotu lu - Chief of the Army Staff General Upendra Dwivedi, Chief of the Naval Staff Admiral Dinesh K. Tripathi leh Chief of the Air Staff Air Chief Marshal Amar Preet Singh te bakah Bhutan lal, Jigme Khesar Mangyel Wangchuk-a leh Mauritius Foreign Minister, Dhananjay Ramful-a te pawh an tel a ni.

**Puan tawh angin Dr. Manmohan Singh-a hi kum 92 mi niin Dec. ni 26
zan dar 9 leh minute 51 khan New Delhi-a AIIMS-ah a thi a ni.**

<><><>